

AKASHVANI AIZAWL
REGIONAL NEWS BULLETIN
HEADLINES (EVENING)

Date – 23/09/2025

Time - 18:30 -18:40Hrs

- BJP MLA Pu K Hrahmo-a'n sawrkar laipuiin GST a siamthat avanga thil man tlawm tawh tur leh Railway Service avanga bungraw phurh man a let a a tlakhniam dawn avangin Mizoramin "Malsawmna Thuah hnih" a dawng a ti.
- National AYUSH Mission, Mizoram buatsaihin vawiin khan Aizawlah National Ayurveda Day 2025 hman a ni.
- Ayushman Bharat- Pradhan Mantri Jan Arogya Yojana chuan vawiin khan kum sarih a tling
- Union Health Minister J P Nadda chuan mipuite ei leh in thianghlim an hmuh theih nan kawng hrang hranga hmalak a ngai a ti.

<><><>

BJP PRESS CONFERENCE

BJP MLA Pu K Hrahmo-a'n sawrkar laipuiin GST a siamthat avanga thil man tlawm tawh tur leh Railway Service avanga bungraw phurh man a let a a tlakhniam dawn avangin Mizoramin "Malsawmna Thuah hnih" a dawng a ti.

He thu hi vawiina Aizawl Press Club-a GST chungchanga thuthar thehdarhtute a kawmnaah sawiin, Pu K Hrahmo chuan GST rate tihhniamin a tum lian ber chu mipui nawlpui ban phak leh man man zawka lei theih tura thil man siamthat a ni a ti a, sumdawngten a man an tihnam ngei tur a ni tih sawiin, nimin atangin GST rate tihhniamna bungrua leh thil zuarte zingah a man tihnam lo report lut a awm chuan dan angin action lak theih a ni tawh a ti a. GST rate tihhniam hmaa bungraw lak tawh te pawh rate thar anga kalpui tawh tur a ni a, mipui nawlpuite chuan an dikna chanvo an hriat a tul hle tih a sawi a ni.

Pu K Hrahmo chuan GST 2.0 atanga mipuiten hlawkna an dawn zingah nitin mamawh ah nasa takin chhiah (GST) a tlahniam a, Cancer tiamin natna khirh tak tak enkawlina damdawi thenkhatah tax pek a ngai tawh dawn lova. Hei hian mi rethei leh harsa zawkte a pui nasa dawn hle a ti a, Tractor leh leilehna hmanraw hrang hrang man nasa taka tlahniam chuan loneitute phurrit tam tak a chhawk theih bakah loneitute a tiphur ang a, thlai tharchhuah pawh a pun ngei a rin thu sawiin, Tax tlahniam chuan sumdawngte leh eichawpzuarte chu nasa takin an sumdawna a ti thang thei dawn niin a sawi a, central sorkar zarah Mizoram chuan hriatreng tawh tur "Malsawmna Thuah hnih" a dawng a, chungte fuu GST siamthat avanga thil man tlawm tawh tur leh Railway Service, abik takin Cargo service avangin bungraw phurh man a let a tlahniam tur te a ni a ti bawk.

<><><>

RASHTRIYA POSHAN MAAH

Nu leh naupang tana chaw tha ei leh in inzirtirna, Rashtriya Poshan Maah vawi 8-na pualin vawiin khan Serchhip ah '2000 steps a day challenge' rally neih a ni a. District Programme Office, Women & Child Development hnuiaia office hrang hrangte he hunah hian an tel.

DCPU te, OSC te, Shakti Sadan te, CDPO, Serchhip ICDS Office staff te leh Anganwadi Workers leh Helper te inkawpin Rashtriya Poshan Maah hman mekah Serchhip AOC kawn atanga Bazar Traffic point bul thleng kawng an zawh a. He Rally '2000 steps a day challenge' hi hriselna atana taksa insawizawi pawimawhzia mipui hrilhhriatna atana neih a ni.

Kawngzawh hi Bazar Traffic point bulah tawpin hetah hian Hriselna atana intiamna Signature Campaign an nei leh nghal a ni.

Sorkar laipui Ministry of Information & Broadcasting hnuaia Central Bureau of Communication, Field Office Aizawl buatsaihin vawiin vek khan Aizawl Khatla-a Anganwadi Centre-ah hun hman a ni a,

He hun hi niin, Anganwadi a thawkte, nu hnute pe laite, tualchhung mite leh damdawilama thawkte an tel a, CBC, Field Office Aizawl, In-Charge Lalginlen Lhouvum chuan kalkhawmte hnenah Poshan Maah in a tum zau zawk te a sawifiah a, khuallian, Khatla Local Council Chairman, Pu C. Lalmuanpuia pawhin thu sawiin, eitur tha zawk ei a nih theih nan khawtlang mipuite inrawlhna pawimawh zia te, taksa in a mamawh khawp ei tur tha hmu lo, malnutrition dolet kawnga thawktute inpekna chu fakawm a tih thu a sawi bawk a ni.

He hunah hian Resource person Dr. Shirleen Lalhriatzuali pawhin naute pianghlim atanga thla 6 thleng an nu hnute tui pek chu an thanlenna kawngah leh hrisselna atan a pawimawh zia leh nute tana eitur tha ei chu nu leh naute tan a pawimawh zia te a sawi a, nu hnute pe laite chuan harsatna hrang hrang an tawh thina vangin an chhungte leh thenawm khawvengte hnenah nu naupawm te chu an rilru leh ei tur tha ei kawngah thlawpna tha tak pe thin turin a chah a ni.

<><><>

AYURVEDA DAY

Health & Family Welfare Minister Pi Lalrinpui'n Mizorama ramhmul damdawi tangkai tak takte chu humhalh a, ram danga thawm chhuak thei khawpa chin pun nachang hriat chuan Mizoramin nasa takin hma a sawn dawn tih a sawi.

He thu hi vawiina Vanapa Hall-a National AYUSH Mission, Mizoram buatsaih, National Ayurveda Day 2025 lawmna a hmanpuinaah sawiin, Ayurveda chu natna enkawlma mai ni lovin nunphung chi khat a ni a, tunlaia nunphung hrisel lo avanga natna pung zelah a la pawimawh zual zel dawn a ni, a ti a. Health Minister chuan Mizoram leilung, sik leh sa leh ruah tui tlak dante chu thing leh mau, thlai leh ramhmul damdawi chi hrang hrangin an ngeih em em a, heng ramhmul damdawi tangkai tak takte hi, humhalh nachang kan hriat a, ram danga thawm chhuak thei khawpa chinpun hunah phei chuan, Mizoramin nasa takin hma a sawn dawn a ni a ti.

Minister chuan AYUSH doctor leh staff, co-located AYUSH facilities-a thawk mek te, Integrated AYUSH Hospital-a thawk te leh AYUSH Health & Wellness Centre 41-a thawk mekte chungah lawmthu sawiin, Ayurveda chu India-in mihringte hnena a thilpek hlu tak a ni a, Ayurveda hmanga hriselna chu mi tin tan a ni a, hrisel taka nung duh apiang tana belhchian tlak, Ayurveda chu chawilara a awm zel a beisei thu a sawi bawk a ni.

Kumin hi National Ayurveda Day lawm a nih tan atanga vawi 10-na niin, thupui atan, ‘Ayurveda for People and Planet’ tih hman a ni a, vawiina Vanapa Hall-a Ayurveda Day lawmna hunah hian Ayurveda damdawi hrang hrang leh thlai tiak thenkhat chu a duh apiang tan a thlawna lak theih tura phochhuah a ni.

<><><>

LAWNGTLAI WEST MLA

Lawngtlai West MLA, Pu C.Ngunlianchungan tunlai hian Mizorama Autonomous District Council dinhmun her danglam tuma hmalakna a awm tih sawiin, Autonomous District Council te chu tiliana, thuneihna sangzawk pek aiin, tuna a dinhmun hi sawrzima, teitet hret hret tuma hmalak a ni a ti.

Tukin khan Thingkah a YLA Information House a hawna ah he thu hi sawiin Pu C.Ngunlianbunga chuan a, hetiang zela Autonomous District Council dinmun teitet a nih chuan, reilote ah Hnam anga thuneihna leh roelna hran neite hian ral hun an neih mai a hlauhawn a ti a. District Council Sorkar, Politician leh mipuiten Autonomous District Council hlutna hre thara, dinmun sang zawk a luahtheih nan duhsak tlaka inherrem a tul a ni a ti.

Pu C.Ngunlianbunga chuan Laifate chu hnam tlemte an nih vangin, Ruihhlo hmanga tihchhiat tham an nilo tih sawiin, Ruihhlo zuartute chu Lairam dinmun thlir chungin Lairam ah Ruihhlo zuarlo turin a chah a, Ruihhlo chu theihtawp chhuah a do ngat ngat a tul thu sawiin, helam hawia YLA hmalakna fakawm a tih thu a sawi bawk.

<><><>

WORLD ALZHEIMERS DAY

Alzheimer and Related Disorders Society of India (ARDSI), Mizoram Chapter buatsaih ‘World Alzheimer’s Day, 2025’ chu Aizawl Chanmari YMA Hall-ah waviin khan hman a ni a. He hun hi Health & Family Welfare Minister Pi Lalrinpuin a hmanpui.

Pi Lalrinpuin chuan NITI Aayog leh ARDSI-ten Alzheimer veite enkawlina kawngah an thawhho thu leh Mizoram sawrkarin Article 275(1) hnuaiah Alzheimer’s Home a sak mek thu a sawi a ni.

ARDSI Mizoram Chapter hian phungbawm sawmin Alzheimer natna sawihona leh natna vei enkawltute zirna seminar leh workshop te an hmang thin a. Mizoram hmun hrang hrangah MUP, YMA leh kohhrante nen Alzheimer natna veite chhinchhiah leh tlawhchhuah hna an thawk a, an thihin an ral bawk thin a. Social media hmangin Mizoram pumah he natna veite chhungkuate inhriattawn leh intawiawmna an buatsaih bawk a ni.

<><><>

KHAWZAWL ILLEGAL DRUGS DISPOSED

Khawzawlah kumin January atanga July thla chhunga ruihhlo man te waviin khan Bawrhsap Pu K. Vanlalthiana leh SP Pu F. Lalbiakzauva hovin halral a ni.

Hemi hun chung hian Case 6 ziahluh niin, mi 7 man an ni a, ruihhlo an man te hi Heroin, Methamphetamine, leh Ganja te an ni a, ruihhlo halral zawng zawng hlut zawng hi cheng nuai 64 sing 3 & 6,655 a ni.

Bawrhsap Pu K. Vanlalthiana chuan Khawzawl District chhunga ruihhlo heti zat man a ni hi lungchhiatthlak a ni a ti a, Sum thianghlim zawk la lut tur a rilru leh taksa hrisel neih pawimawhzia sawiin, ruihhlo zuar tute leh a hmangtute pawhin a an sim ngei a duh thu a sawi a. Police te leh Excise te inpekna leh thawhrimnaaha lawm hle thu sawiin, hun lo kal leh zel turah pawh hei aia nasa a tan la a, theihtawp chhuah leh zel turin a sawm bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vaviin chawhnu dar 2 leh a chanve-ah Chanchinthar puan leh a ni ang.

<><><>

AYUSHMAN BHARAT

Ayushman Bharat- Pradhan Mantri Jan Arogya Yojana chuan vawiiin khan kum sarih a tling. Kum 2018 September thla khan khawvela health Care scheme lian ber hi Ranchi atangin hawn a ni a. He scheme hian ramchhung healthcare a rawn thlak danglam bek a ni. PM Modia chuan mipui healthcare chungchangah Ayushman Bharat chuan nasa takin inthlak danglamna a rawn thlen tih a sawi a. Social Media lamah he thu hi tarlangin Pu Modia chuan mipuite tan sum leh paia himna leh zahawmna a thlen tih a sawi a. Ayushman Bharat chu hmalam huna mamawh tur lo inhmakhuana anih tu sawiin mipuite tana man tlawm zawka inenkawlina tur a ni a ti bawk.

<><><>

FOOD SAFETY

Union Health Minister J P Nadda chuan mipuite ei leh in thianghlim an hmuh theih nan kawng hrang hranga hmalak a ngai a ti. Vawiiina Global Food Regulators Summit New Delhi-a neihah he thu hi sawiin Pu Nadda chuan ei leh in thianghlim leh thianghlim loh endikna dan chu ennawn fo a tha a ti a. Food Safety and Standard Authority of India chuan hna pawimawh tak an thawk thei tih a sawi bawk a ni.

<><><>

SEVA PARV

Mipui rawngbawl leh sawrkar inrelbawlina tha thupuia neiin Prime Minister Narendra Modia hnuaiah ramchhungah hmasawmna tam tak thlen mek a ni. Tun tum Seva Parv hunah chuan PM Modia sawrkarin hna thar tam tak siama thalaite tana eizawmna a siamsak dan tarlang ila. Kum 11 kalta chhung khan PM Modia sawrkar hian hna thar siam hi a ngai pawimawh hle mai a. Industry lama tihhmawsawn niin rampawna thil thawmchhuahte tihpun a ni a. Hei hian hna tam tak a siam a ni. Hemi atana paiwmawh tak chu Rozgar Mela niin kum 2022 October thla khan PM Modia chuan a hawng a. Ramchhunga thalai tam tak hna thar pek kawngah theihtawp chhuah a ni a. Vawiiin thlengin Rozgar Mela hi rampum huapin tum 16 neih tawh a ni

<><><>